



## Amaloota Gabroota Ar-Rahmaan-Kutaa 5.1

### Description

Amaloota gaggaarii gabroota Ar-Rahmaan waliin barachuuf baga nagahaan walitti deebine. Kutaa darbe keessatti hojii gaggaarii gabroonni Ar-Rahmaan hojjatan ilaala turreera. Harâ€™a immoo hojii badaa isaan irraa fagaatan ni ilaalla. Itti haa fufnuuâ€!

لَا يَدْعُونَ مَعَ اللَّهِ إِلَهًاٰءَآخَرَ وَلَا يَقْتُلُونَ الْنَّفْسَ إِلَّا بِالْحَقِّ  
وَمَنْ يَفْعَلْ ذَلِكَ يَلْقَ أَثَامًاٰ ۝ يُضَعِّفُ لَهُ الْعَذَابُ يَوْمَ الْقِيَمَةِ وَيَخْلُدُ فِيهِ  
إِلَّا مَنْ تَابَ وَعَمِلَ عَمَلًا صَلِحًا فَأُولَئِكَ يُبَدِّلُ اللَّهُ سَيِّئَاتِهِمْ حَسَنَاتٍ  
اللَّهُ غَفُورًا رَّحِيمًا ۝ وَمَنْ تَابَ وَعَمِلَ صَلِحًا فَإِنَّهُ وَيَتُوبُ إِلَى اللَّهِ مَتَابًا ۝

â€œIsaan Rabbiin waliin gabbaramaa biraa kanneen hin kadhanne, haqaan malee nafsee Rabbiin haraama godhe hin ajjeesnee fi zinaa (sagaagalummaa) hin raawwanneedha. Namni kana hojjate adabbi qunnama. Guyyaa Qiyaamaa adabbiin isaaf dachaa taâ€™a, kan salphifame taâ€™ee yeroo hundaa achi keessa jiraata. Nama tawbate, amanee fi hojii gaarii hojjate malee. Warra san Rabbiin hamtuu isaanii gaariitti jijjiraaf. Rabbiin Araaramaa, rahmata godhaa taâ€™eera. Namni tawbate fi hojii gaarii hojjate, dhugumatti inni gara Rabbii tawbaa dhugaa tawbata.â€ Suuratu Al-Furqaan 25:68-71

Amaloota gabroota Ar-Rahmaan ifatti bahan keessaa: badii fi cubbuu gurguddaa irraa fagaachudha. Rabbiin (Azza wa jalla) aayaata tanniin keessatti badii gurguddaa sadii adda baasun dubbate. Sababni isaas, isaan sadan kunniin badii gurguddaa hunda kan caalanii fi garmalee cimaa taâ€™aniidha. Badiin sadan kunniinis:

- Rabbiin waliin waan biraa gabbaruu (shirkii)
- Nafsee nagahaa ajjeesu
- Zinaa (sagaagalummaa)

Shirkiin haqa Rabbiin gabroota irraa qabuun kan wal qabatu yommuu taâ€™u, badii nama osoo hin tawbatin isarratti duâ€™eef Rabbiin hin araaramneedha. Akkuma Rabbiin subhaanahu wa taâ€™aalaa jedhe:

إِنَّ اللَّهَ لَا يَغْفِرُ أَن يُشْرِكَ بِهِ، وَيَغْفِرُ مَا دُونَ ذَلِكَ لِمَن يَشَاءُ وَمَن  
يُشْرِكُ بِاللَّهِ فَقَدِ افْتَرَ إِثْمًا عَظِيمًا

٤٨

â€œ**Dhugumatti Rabbiin Isatti** waa qindeefamuu hin araaramu. Waan sanaa gadii nama fedheef ni araarama. Namni Rabbitti qindeesse dhugumatti cubbuu guddaa uumee jira.â€ Suuraa An-Nisaa 4:48

Nama shirkii irratti osoo hin tawbatin duâ€™e Rabbiin isaaf hin araaramu. Garuu duâ€™aan dura yoo tawbate ni araaramaa. Akkuma aayah armaan olii suuratu Al-Furqaan keessatti ilaallutti.

Namni ibaadaa irraa kanneen akka duâ€™aayi, birmannaa, nazrii (silatii), qalma, salaata, fi kanneen biroo Rabbiin ala wanta biraatiif godhe, dhugumatti badii nama balleessuu fi yakka hundarra guddaatti taree jira. Badii fi yakki kunis shirkiidha.[\[1\]](#)

Gabrooni Ar-Rahmaan kana waan beekaniif, â€œ**Isaan Rabbiin waliin gabbaramaa biraa kanneen hin kadhanneeâ€**â€. Kana jechuun haajaa addunyaa fi Aakhirah isaaniitiif Rabbiin kadhachuu waliin gabbaramaa biraa Rabbiif shariika godhanii hin kadhatan.[\[2\]](#)

Duâ€™aayin (kadhaan) bakka lamatti quodama:

**1ffaa- Duâ€™aaâ€™ul Masâ€™alati (Duâ€™aayi gaafit)**â€“ kun namtichi faayda wayii argachuuf ykn miidhan isarra akka kaâ€™uuf Rabbiin kadhachuudha. Fakkeenyaf, â€œYaa Rabbii addunyaa fi aakhiratti waan gaarii naaf kenni.â€ Yoo jedhe kuni duâ€™aayi gaafiti.

**2ffaa-Duâ€™aaâ€™ul-Ibaadati (duâ€™aayi ibaadâ€)**â€“ gochi ibaada kamiyyuu duâ€™aayi kana jalatti ramadama. Kanneen akka Rabbiin faarsu, salaatu, zakaa kenu, hariiroo firummaa sufuu, waan gaaritti ajajuu fi waan badaa irraa dhoowwu fi kkf.

Namni tokko,â€œAkkamitti ibaadan akka zakaa, salaata fi kanneen biroo duâ€™aayi ykn kadhaa taâ€™aa?â€ Jedhe gaafachuu dandaâ€™a. Deebiin isaaakkana: Namni Rabbii oltaâ€™a gabbaru dhugumatti Isa kadhachaa jira. Sababni issaas, kan inni ibaada kana hojjatuuf, rahmata Rabbii kajeele fi azaaba (adabbi) Isaa sodaateti. Namni yommuu salaatu, zakaa kenu, soomu, hajji hajjuu, haadha abbaaf tolu oolu, hojji kanaan maal barbaadaa jira? Mindaan Rabbii barbaadaa jira. Akka waan akkana jedhuuti: Yaa Rabbi! Mindaan naaf kenu, Jannataan na badhaasi, ibidda irraa na baraari.â€ Fi kkf jedha. Kanaafi, ibaadaan duâ€™aayi jedhamuun waamame. Nama Rabbiin gabbaru â€œMaaliif Rabbiin gabbartaa?â€

jette osoo gaafatte, akkana jechuun deebisa: mindaa isaa kajeelee fi azaaba isaa sodaadheti.â€ Haqiqadhaan namni kuni kadhataadha.[\[3\]](#)

Gama biraatin, kadhaanis ibaadadha. Sababni isaas, akka lugaatti ibaada (gabbarri) jechuun of gadi qabuu fi of xiqqeessudha. Kadhataan wanta kadhatu san argachuuf waan of gadi qabuu fi of gadi xiqqeessuuf, kadhaan isaa kuni ibaada (gabbarrii) dha.

Gabroonni Ar-Rahmaan amaloota isaanii keessaa tokko, Rabbiin waliin waan biraan hin gabbaran. Ibaada gosa kamiyyuu Isaan ala wanta biraatiif hin godhan. Ibaadawan kanniin keessaa inni dursaa, duâ€™aayi (kadhaa)dha. Rabbiin ala wanta biraatiif of gadi qabuu fi wanti kuni dandeetti of dandaâ€™ni qaba jedhanii amanuun hin kadhatan. Gabaabumatti Rabbiin ala wanta biraatiif of gadi qabuun, kajeelu fi sodaachuun hin kadhatan. Sababni guddaan kanatti isaan geesse maal akka taâ€™e beektuu?

Gabroonni Ar-Rahmaan sirna kawnii (yuniversii) ni ilaalan. Ergasii, wanta dachii fi samii keessatti adeemsifamuu sababoota akka qaban ni beekan. Garuu sababoonni tooâ€™anna Rabbii Injifataa taâ€™eef kan bulaniidha. Hayyama Rabbiitiin malee sababooni kunniin buâ€™aa buusu hin dandaâ€™an. Kan amaloota addaa sababoota hunda keessaa kaâ€™ee fi humna ittiin buâ€™aa buusan isaaniif maddisiisu Rabbii oltaâ€™aadha. Dhugaadhaan sababoota kanniin yoo ilaalle, mataa ofiitiin homaa gochuu hin dandaâ€™an. Kana irra, Rabbiin sababoota kanaan murtii Isaa hojii irra oolcha. Fakkeenyaaaf, barataan yuniversitii xumure tokko qacarrii barbaada. Qaxaramee hojii hojjachuu jalqabe haa jennu. Asitti, bulchaan mindaa isaaf kenu fi hojiin isaa â€œSababootaâ€ Buâ€™aan immoo â€œMindaaâ€ha. Buâ€™aan kuni kan argamee murtii Rabbiitini. Osso Inni sababoota laaffisuu baate silaa namni kuni eessaa mindaa argataa?

Kanaafu, gabroonni Ar-Rahmaan sababni fi buâ€™aan murtii Rabbiitiin akka taâ€™an beekun, kadhaa fi ibaadaa isaanii guutuu Rabbi qofaaf godhan. Eeti, hojii isaan irraa eeggamu ni hojjatu. Garuu qalbii isaanii sababa irratti hin rarraasan. Kana irra, Khaaliqa sababoota uume irratti rarraasu. Furtuwwan samii fi dachii Isa harka jiru. Sababoonni hayyama Isaatiin malee homaa buâ€™aa buusu hin dandaâ€™an.

Gubbaa hojiitii, isaan sababoota taâ€™uu; hidda qalbii isaanii keessatti immoo Rabbii Tokkicharratti hirkattoota. Sababootaa fi karaalee wanta barbaadan itti argatan ni hojjatu, buâ€™aa immoo akka isaanif galma geessuuf Rabbiin kadhatu. Kuni wanta iimaanni isaan irratti dirqama godheedha. Isaan Rabbiin waliin gooftaa biraa hin kadhatan, gadi hin jedhaniif. Namoota, jinni, malaykoota, taabota, namoota duâ€™anii fi warra qabrii irraa eenyullee hin gabbaran. Akkasumas, seera uumamaa fi sababoota yuniversi (Universal cause) hin gabbaran. Sababni isaas, wanti hundi Rabbiif akka gadi jedhuu fi buluu ni beeku. Kanaafu, Gabroonni Ar-Rahmaan kan nama miidhu fi fayyadu, rakkoo namarrea kaasu dandaâ€™uu Rabbiin qofa taâ€™uu waan beekaniif, wanta nama miidhu fi fayyadu hin dandeenye hin kadhatan, gadi hin jedhaniif.

Gabroota Ar-Rahmaan keessaa Nabii Ibraahim dhugaa armaan olii akkamitti akka labsee mee haa ilaallu:

لُّ عَلَيْهِمْ نَبَأً إِبْرَاهِيمَ ﴿٦٦﴾ إِذْ قَالَ لِأَبِيهِ وَقَوْمِهِ مَا تَعْبُدُونَ ﴿٦٧﴾ قَالُوا نَعْبُدُ  
 مَا فَنَظَلَ لَهَا عَكِيفِينَ ﴿٦٨﴾ قَالَ هَلْ يَسْمَعُونَكُمْ إِذْ تَدْعُونَ ﴿٦٩﴾ أُوْ يَنْفَعُونَكُمْ  
 شُرُونَ ﴿٧٠﴾ قَالُوا بَلْ وَجَدْنَا إِبَائَنَا كَذَلِكَ يَفْعَلُونَ ﴿٧١﴾ قَالَ أَفَرَءَيْتُمْ مَا كُنْتُمْ  
 وَنَّ ﴿٧٢﴾ أَنْتُمْ وَإِبَاؤُكُمُ الْأَقْدَمُونَ ﴿٧٣﴾ فَإِنَّهُمْ عَدُوُّ لِي إِلَّا رَبُّ الْعَالَمِينَ ﴿٧٤﴾ أَلَّذِي  
 فَهُوَ يَهْدِيْنِ ﴿٧٥﴾ وَالَّذِي هُوَ يُطْعِمُنِي وَيَسْقِيْنِ ﴿٧٦﴾ وَإِذَا مَرِضْتُ فَهُوَ يَشْفِيْنِ ﴿٧٧﴾  
 يُمِيتُنِي ثُمَّ يُحْيِيْنِ ﴿٧٨﴾ وَالَّذِي أَطْمَعُ أَنْ يَغْفِرَ لِي خَطِيئَتِي يَوْمَ الدِّينِ ﴿٧٩﴾

Seenaa Ibraahim isaan irratti dubbisi. Yeroo inni abbaa fi ummata isaatiin, â€œMaal gabbartuu?â€ jedhe. â€œSanamoota gabbarra. Isaan bira dhaabbachuu itti fufna.â€ Jedhan. [Ibraahimis] ni jedhe, â€œSila yommuu kadhattan isin dhagahuu? Yookiin isin fayyadu yookiin ni miidhuu?â€ Isaanis ni jedhan, â€œLakki, abbooti keenya akkas kan dalagan taâ€™anii arganne.â€ Innis ni jedhe, â€œSila wanta gabbaraa turtan argitanii? Isinii fi abbootin keessan duraanii? Gooftaa aalamaa malee dhugumatti isaan anaaf diinota. [Gooftaan aalamaa] Kan na uumedha, Inni na qajeelcha. Kan na nyaachisuu fi na obaasu Isa. Yommuu dhibame Isatu na fayyisa. Kan na ajjeesu ergasii na jiraachisuudha. Guyyaa Murtii dogongora kiyya akka naaf araaramu Kan kajeeludha.â€ Suuratu Ash-Shuâ€™uraa 26:69-82

Nabii Ibraahim (aleyh salaam) dhugaa wanta gabbaranii isaan hubachiisuuf, waaâ€™ee sanamoota ilaalchise wanta amanan ykn wallaalummaa fi gowwummaa isaanii ifatti baasuuf abbaa fi ummata isaa gaafi gaafachuun jalqabe. â€œMaal gabbartuu?â€ kana jechuun haqiqaan wanta isin gabbartanii fi amalooni isaa maali? Isaanis â€œSanamoota gabbarra. Isaan bira dhaabbachuu itti fufna.â€ Jedhan. â€œSanamootaâ€ Cheddumminna (danuu) â€œesanamaaâ€ ti. Sanama jechuun siidaa dhagaa, muka, sibiila ykn wanta biraa irraa taâ€™ee fi warroonni isa waaqefatan gara Rabbiitti ykn gabbaramaa biraatti nu dhiyeessu jechuun odeessu. Amaariffaan Xaaâ€™ot, Ingiliffaan immoo â€œIdolâ€ Jedhama. Sanama gabbaruun kan taâ€™uu waa isaaf dhiyeessu, sujuuda buâ€™uufi, irra naannawu, qalma qaluufi, yeroo dheeraaf bira dhaabbachuuun ykn faayda argachuu fi miidhaa deebisuuf kadhachuuni.

Kana booda ibsi â€œSanamoota gabbarra. Isaan bira dhaabbachuu itti fufnaâ€ â€“ siida harka keenyaan bocnee fi hojannee yeroo keenya baayâ€™ee isaan gabbaruu fi kadhachuuf bira dhaabbanna.

Namni wanta tokko kan gabbaruuf (waaqefatuuf) faayda irraa barbaadeti mitii? Wanta faayda namaaf fiduu hin dandeenye ykn miidha namarraa deebisu hin dandeenye akkamitti gabbaranii? Dhugaa kana ifa baasuuf Nabii Ibraahim gaafi isaa itti fufee: â€œSila yommuu kadhattan isin dhagahuuâ€ kana

jechuun haajaa jirenyaa keessanii kanneen akka rizqii, gargaarsa, ilma, nageenya fi kkf argachuuf yommuu isaan kadhatten, isin dhagahuu? â€œYookiin isin fayyadu yookiin ni miidhuu?â€ Kana jechuun yoo isaan gabbartan (waaqefattan) isin fayyaduu? Yookiin yoo gabbaruu dhiistan isin miidhuu? Yookiin immoo yommuu isaan gabbartan diinota keessan ni miidhuu?

(Warroota Rabbiin ala wantoota biraan kan akka Malaykaa, sanamaa, Nabii Iisaa, awliyaa, nama duâ€™ee fi kkf kadhatan gaafima armaan olii osoo gaafatamanii, deebiin isaanii takkaa â€œEetiâ€ jechuun soba dubbatu takkaa immoo dhugaa dubbachuu amanu.) Deebiin ummanni Nabii Ibraahim deebisan, â€œ **Lakki, abbooti keenya akkas kan dalagan taâ€™anii arganne.**â€ Kana jechuun sanamoonni kunniin kadhaa keenya ni dhagahan, isaan ni fayyadan ykn ni miidhan jennee mirkaneessu hin dandeenyu. Garuuakkuma nuti isaan kadhannuu fi gabbaru kana abbootin keenyas kan gabbaranii fi kadhatan taâ€™anii argine. Nutis isaan akkeessina ykn hordofna.

Haala kanaan Ibraahim baaxila (soba) ifa bahaan irra akka jiran isaaniif ibse. Haala kaminiyyuu wanta abbootin irra turan akkeessun gonkumaa ragaa qabatamaa taâ€™uu hin dandaâ€™u. Sababni isaas, tarii abbootiin wallaaltota ykn jallattoota fedhii qullaa hordofan taâ€™uu dandaâ€™u. Kanaafu, abbootin isaanii wallaaltota ykn jallattoota waan taâ€™aniif wanti isaan gabbaran baaxila (soba) ifa bahaadha. Sababni isaas, isaanis taâ€™ee abbootin isaanii, ragaa Rabbiin irraa dhufe ykn ragaa sammuu qabatamaa hojii isaanii kana dhugoomsu hin qaban. Kanaaf itti aanse Ibraahim ni jedhe, â€œ **Sila wanta gabbaraa turtan argitanii? Isinii fi abbootin keessan duraanii?**â€ Wanta isinii fi abbootin keessan darban Rabbii gaditti gabbartan itti xinxalluun sammuu fi qalbii keessaniin soba taâ€™uu isaa hin argitanii? Isiniis abbooti keessan akkeessun sanama gabbaruu itti fuftan.

â€œ **Gooftaa aalamaa malee dhugumatti isaan anaaf diinota.**â€ Sababni isaas, Gooftaa aalamaa gaditti wanti isin gabbartan kunniin amala gabbarama isaan taasisu waan hin qabneef baaxila (soba). Baaxilli immoo diina kiyya. Gonkumaa wanta isin gabbartan ani hin gabbaru. Kan ani gabbaru sanama homaa gochuu hin dandeenye osoo hin taâ€™iin Gooftaa wantoota hundaa uume, isaan tooâ€™atu fi qindeessu gabbara. Itti aansee amaloota Gooftaa aalamaa akka gabbaruu isa taasisuu ifa godhe:

â€œ **[Gooftaan aalamaa] Kan na uumedha, Inni na qajeelcha.**â€ Kana jechuun safara wanta hundaa na keessa jiran kan murteesse fi dhabama irraa na argamsisee Gooftaa aalamaati. Ergasii Isa qofatu gara faaydaa addunyaa fi Aakhiraatti na qajeelcha.

â€œ **Kan na nyaachisuu fi na obaasu Isa.**â€ Kan na nyaachisuu fi obaasu Isa qofa. Isaan ala kan biraati miti. Soorata namootaa kan uumuu fi sababoota kan laafisu Rabbiidha (subhaanahu wa taâ€™aala). Ibraahim isaan keessaa tokko. Osoo Rabbiin uumuu fi murteessu baate, silaa biqiltoonni hin biqilan, lubbu-qabeenyin hin jiraatan. Osoo karaa nyaataa laaffisuu baatee, silaa sorataan dachii irraa homaa hin nyaatu ture. Osoo Rabbiin lubbu-qabeenyiif afaan ittiin nyaatan, ujumoo gara garaa ittiin liqimsaan, meeshaalee daakkaa nyaataa daaku, ujumoolee fi kutaalee qaamaa nyaataa bakka barbaachisutti raabsanii fi xurii hafee immoo gara alaatti baasan gochuu baate, silaa lubbu-qabeenyin soorata hin sooratu turan. Ammas, marsaalee adda addaa keessa dabarsuun bishaan uumee samii irraa kan buusu Rabbii tokkicha. Kanaafu, kan soorata uumuu, sababa soorataa laaffisuu fi qaamoolee soorataa namaaf uumuun nama sooruu fi obaasu Rabbii Tokkicha qofa.

â€œYommuu dhibame Isatu na fayyisaâ€ Asitti Ibraahim Rabbii oltaâ€™aa waliin naamusa (adaba) qabate. Yommuu Gooftaan kiyya na dhukkubse hin jenne. Kana irra â€œeyommuu dhibameâ€ jedhe. Kuni, namni wanta jibbu yommuu isa qunnamu Gooftaa isaa waliin adaba (naamusa) qabaachu akka qabu agarsiisa. Nabii Ibraahim (aleyh salaam) â€œeyommuu dhibame kan na fayyisu Rabbiin qofa.â€ jedhe. Sababni isaas, fayyuun murtii Rabbiitiin malee galma hin gahu. Dhibamaan akka fayyu yoo Rabbiin murteesesse, ogeessi fayyaa dawaa fayyuuf sababa taâ€™u akka kennuu dandeesisa. Dhibamaanis hayyama Rabbiitiin ni fayya. Dawaanis sababoota Rabbiin uumee keessa tokko. Fayyuun murtii Rabbiitiin malee hin mirkanaaâ€™u. Nabii Ibraahim, yommuu dhibame kan na fayyisu Rabbiin qofa jedha. Kiristaanoni maal taâ€™aniitin â€œIyyasuus fayyisaadhaâ€ Jedhu ree? Nabii Ibraahim (Abraahamtu) irra beekaadha moo isaantu irra beekodhaa?

â€œKan na ajjeesu ergasii na jiraachisuudha.â€ Lubbu-qabeenyi ajjeessun uumama Rabbiin uumee keessaa tokko. Sababni isaas, duuti kan mirkanaaâ€™u yommuu ruuhi fi qaamni addaan bahaniidha. Ruuhi qaamatti qabsiisuu fi addaan baasun uuminsa fi hojji Rabbiin qofa. Rabbiin ala eenyutu ruuhi uumee qaama duâ€™aa keessa galchuu dandaâ€™aa.[\[4\]](#) Nabii Ibraahim itti aansee amanti Guyyaa Qiyaamaatiif qabu labse, â€œergasii na jiraachisuudha.â€ Erga duâ€™ee yeroo murtaaâ€™eeef awwaalcha keessa turee booda Guyyaa Qiyaamaa na jiraachisuun kan na qoratu Rabbiin qofa. Kanaafu, Qiyaamaan dhufuun haqa waan taâ€™eeef â€œGuyyaa Murtii dogongora kiyya akka naaf araaramu Kan kajeeludha.â€ Addunyaa fi Aakhiratti badii kan namaaf dhoksuu fi yoo araarama kadhatan sababa badiitiin kan nama hin adabne Isa malee hin jiru. Rabbiin malee badii hunda kan namaaf araaramu ni jiraa?[\[5\]](#)

Kana hunda kan hojjatu Rabbii tokkicha. Kanaafu, sanamaa fi uumamtoota biroo kan homaa hin uumne, hin qajeelchine, hin fayyisne, hin nyaachisnee, hin obaasnee, hin ajjeesne, hin jiraachisne, nama isaan waaqefatu hin fayyannee fi miidhaa irraa hin deebisne dhiisun ibaadaa fi ajajamuu keessatti Rabbiin tokkichoomsuun dirqama.[\[6\]](#) Dubbiin ergaakkana taâ€™e, Rabbiin ala wanta biraa gabbaruun adabbii guddaatti nama geessa:

لَا تَجْعَلْ مَعَ اللَّهِ إِلَّهًا أَخْرَ فَنَقْعُدْ مَذْمُومًا مَخْذُولًا



â€œRabbiin waliin gabbaramaa biraa hin godhin.[Yoo akkas goote] balaaleffatamaa fi gargaaraa kan hin qabne taatee teessati.â€ Suuratu Al-Israa 17:22

Kana jechuun umamtoota irraa eenyullee ibaada (gabbari) haqa ni godhata jettee gonkumaa hin amaniin. Isaan keessaa eenyullee Rabbiin waliin hin gabbarin. Sababni isaas, kuni gara balaalefanna fi gargaarsa dhabuutti nama waama. Rabbiin, Malaykonni Isaa fi Ergamtooni Isaa shirkii irraa dhoowwanii fi nama isa hojjatu waqqasaa cimaa waqqasanii jiru. Maqaa badaa fi amala fokkuu isatti maxxansaniiru.

Namni hamma Gooftaa isaatti rarraqâ€™uu dhiiseen dhimma addunyaa fi Aakhirah isaa keessatti gargaarsa dhabuutu isaaf jira. Namni Rabbiin ala wanta biraatti rarraqâ€™e, gargaarsa dhaba. Wanta inni itti rarraqâ€™etti isa dhiisa. Hayyama Rabbiitiin malee uumamtoota keessaa eenyullee nama gargaaru hin dandaâ€™u. Namni Rabbiin waliin gabbaramaa biraa taasise maqaa badaan yommuu waamamuu fi gargaarsa dhabuu, namni Rabbiin tokkichoomb fi Isatti rarraqâ€™e immoo maqaa gaariin waamama,

haala isaa hunda keessatti gargaarsa argata.[\[7\]](#)

Aayah keessatti, jecha â€œMakhzuulaaâ€ jedhutti xiyyeffannoo guddaa itti kennu barbaachisa. Namni wanta tokko kan gabbaruuf gargaarsa barbaadeti mitii? Tarii namni yommuu Rabbii oltaâ€™aa gaditti wanta biraan gabbaru gargaarsa nan argadha jedhee yaada. Garuu dhugaan faallaa kanaati. **Makhzuul** jechuun nama gargaaraa isa gargaaru hin qabne jechuudha. Dhugumatti namni Rabbii gaditti wanta biraan gabbaru, gargaarsa hin argatu. Kuni isaaf addunyaa keessatti adabbiidha. Addunyaattis taâ€™e Aakhiratti wantoonni inni Rabbii gaditti gabbaru homaa isa hin fayyadan. Ergasii adabbi Aakhiratti argatu dubbate:

﴿وَلَا تَجْعَلْ مَعَ اللَّهِ إِلَهًاٰءَاخَرَ فَتُلَقِّي فِي جَهَنَّمَ مَلُومًا مَذْحُورًا﴾

â€œRabbiin waliin gabbaramaa biraan hin godhin.[Yoo akkas goote] komatamaa fi fageefamaa taatee Jahannam keessatti darbamtaati.â€ Suuratu Al-Israa 17:39

Kana jechuun Rabbiin waliin waan biraan hin gabbarin. Rabbiin waliin waan biraan gabbaruu jechuun wanta nama hin fayyannee fi hin miine kadhachuu, sodaachu, irratti hirkachuu, wanta saniif sagaduu, qalma qaluu, nazrii (silatii) gochuu fi gosoota ibaada birootin itti dhiyaachuudha. Rabbiin waliin waan biraan yoo gabbarate, Guyyaa Qiyaamaa badii fi amala badaan kan ibsamtuu taate fi rahmata Rabbii irraa fageefamte Jahannam keessatti darbamta. Dhugumatti Jahannam iddo gahuumsaa taâ€™uun garmalee fokkatte, garmalee badde. Rabbiin subhaanahu wa taâ€™aalaa nu hundaa Jahannam irraa haa tiiksu.

â€œNamni tokko Rabbiin yoo hin gabbarin, wanta biraas yoo hin gabbarin adabbiin isa ni qunnamaa?â€ jedhame gaafatamuu dandaâ€™a. Deebiin isaa, kan nama argamsiisee fi qanani adda addaatin nama qananiisu Rabbii oltaâ€™aa waan taâ€™eeef, dirqamni namoota irra jiru Isaaf galata galchuu fi gabbaruudha. Kanaafu, yoo Isa gabbaruu dhiisanii of tuulan adabbi cimaatu isaan qunnam. Qurâ€™aana keessatti ni jedha:

﴿إِنَّ الَّذِينَ يَسْتَكْبِرُونَ عَنْ عِبَادَتِي سَيَدُّخْلُونَ جَهَنَّمَ دَآخِرِينَ﴾

â€œDhugumatti, isaan Ana gabbaruu irraa boonan, salphattoota taâ€™anii Jahannam seenuf jiru.â€ Suuratu Ghaafir 40:60

Kana jechuun Ani Gooftaa isaanii qanani adda addaatiin isaan qananiisu taâ€™ee osoo jiru warroonni of tuuluu isaanii keessatti lixuun Ana gabbaruu didan, Guyyaa Qiyaamaa xiqlaattoota fi salphattoota taâ€™anii Jahannamiin ni seenu[\[8\]](#) Kunis jazaa isaanitii. Jazaan nama of tuulu salphinnaa fi xiqlaentya waan taâ€™eeef, namoonni Rabbii isaanitiif gadi of qabuu fi ajajamu irraa of tuulan Jahannamin salphattoota fi xiqlaattoota taâ€™anii seenu.

---

Gabaabumatti, Gabroonni Ar-Rahmaan Rabbii oltaâ€™aa qofa gabbaru. Isa waliin homaa hin gabbaran. In sha Allah ibsaa aayaata suuratu al-Furqaan kutaa itti aanu keessatti itti fufnaâ€!.

---

**Kitaabban wabii**

- [1] Sifaatu Ibaadu Rahmaani-fuula 19-20, Abdurazzaaq Abdul Muhsin Badrii
- [2] [Maâ€™aariju Tafakkuri wa daqaaâ€™iqu tadabburi-6/631](#)
- [3] Tafsiiru Qurâ€™aanil Kariim, Suuratu Furqaan, fuula 283, Muhammad bin Saalih Useymiin
- [4] Maâ€™aariju Tafakkuri wa daqaaâ€™iqu tadabburi-8/621-629
- [5] Tafsiiru Ibn Kasiir-5/629
- [6] Tafsiiru Saâ€™dii-fuula 694
- [7] Tafsiiru Saâ€™dii-fuula 529
- [8] [Maâ€™aariju Tafakkuri wa daqaaâ€™iqu tadabburi -12/403](#)

**Date Created**

November 8, 2019

**Author**

admin